



**ურთიერთთანამშრომლობის მემორანდუმი  
საქართველოს კონკურენციის ეროვნულ სააგენტოსა  
და  
სსიპ - ქუთაისის საერთაშორისო უნივერსიტეტს  
შორის**

ქ. ქუთაისი

04/მაისი/2023 წ.

ერთი მხრივ, საქართველოს კონკურენციის ეროვნული სააგენტო (შემდგომში „სააგენტო“) წარმოდგენილი მისი თავმჯდომარის - ირაკლი ლექვინაძის სახით და მეორე მხრივ, სსიპ - ქუთაისის საერთაშორისო უნივერსიტეტი (შემდგომში „უნივერსიტეტი“), წარმოდგენილი მისი აღმასრულებელი დირექტორის / რექტორის - ალექსანდრე თევზაძის სახით, ცალ-ცალკე „მხარედ“, ხოლო ერთობლივად „მხარეებად“ წოდებულნი, აღიარებენ რა, ორმხრივ ინტერესს ხელი შეუწყონ სტუდენტების მიერ მიღებული ცოდნის პრაქტიკულ განაღვივებასა და განზოგადებას, მათი კვალიფიკაციის ამაღლებისა და პროფესიული უნარ-ჩვევების გამომუშავებას, ასევე, „მხარეებს“ შორის გამოცდილებისა და ცოდნის გაზიარებას შესაბამის სფეროში დარგობრივი უნარების გაღრმავების მიზნით, აფორმებენ მემორანდუმს (შემდგომში „მემორანდუმი“) და თანხმდებიან შემდეგზე:

**მუხლი 1. მემორანდუმის საგანი**

- 1.1. წინამდებარე მემორანდუმით მხარეები, თავისი კომპეტენციისა და საქართველოს მოქმედი კანონმდებლობის შესაბამისად, ადგენენ ორმხრივი თანამშრომლობის ფარგლებს;
- 1.2. მემორანდუმის საგანია მხარეთა ურთიერთთანამშრომლობა საგანმანათლებლო სფეროში, ერთობლივი ძალისხმევითა და მხარდაჭერით სტუდენტების ხელის შეწყობა კვალიფიკაციის ამაღლებასა და პროფესიული უნარ-ჩვევების გამომუშავებაში;
- 1.3. მემორანდუმის ფარგლებში უნივერსიტეტის სტუდენტების მიერ, სააგენტოსთან ურთიერთობის გზით, პრაქტიკული გამოცდილების მიღება;
- 1.4. უნივერსიტეტის სტუდენტების მიერ სააგენტოში, შესაძლებლობის ფარგლებში, პროგრამით გათვალისწინებული (ასეთის არსებობის შემთხვევაში) პრაქტიკის/სტაჟირების გავლა;
- 1.5. მხარეებს შორის სამეცნიერო და გამოყენებითი კვლევების ფარგლებში გამოცდილებისა და ცოდნის გაზიარება;

## **მუხლი 2. მემორანდუმის მიზანი**

2.1. მემორანდუმის მიზანია სტუდენტების დახმარება ხარისხიანი პრაქტიკული განათლების მიღებასა და თვითრეალიზაციაში:

2.1.1. უნივერსიტეტის სტუდენტების მიერ პროგრამის ფარგლებში მიღებული თეორიული ცოდნის პრაქტიკული განმტკიცება;

2.1.2. შესაბამისი გამოცდილების გაზიარება;

2.1.3. უნივერსიტეტში შესაბამისი პროგრამის სტუდენტებისათვის საგანმანათლებლო პროგრამით გათვალისწინებული პრაქტიკული სასწავლო კურსის გავლა და სტუდენტთა შეფასება;

2.1.4. სააგენტოს კომპეტენციისა და შესაძლებლობის ფარგლებში პრაქტიკისა და სტაჟირების გავლა, ერთი სემესტრის განმავლობაში, შეუძლია მაქსიმუმ 10 (ათი) სტუდენტს.

2.2. სამეცნიერო-კვლევით სფეროში თანამშრომლობის ხელშეწყობა უნივერსიტეტის აკადემიურ პერსონალს და სააგენტოს შესაბამისი დეპარტამენტების წარმომადგენლებს შორის, ცოდნისა და გამოცდილების გაზიარებისა მიზნით.

2.3. სამეცნიერო და კვლევითი საქმიანობის მხარდაჭერა მონაცემების ხელმისაწვდომობის უზრუნველყოფით, მოქმედი კანონმდებლობის გათვალისწინებით.

## **მუხლი 3. თანამშრომლობის ფარგლებში მხარეთა უფლება-მოვალეობები**

3.1. სააგენტო გამოხატავს მზადყოფნას:

ა) მოქმედი კანონმდებლობით დადგენილი წესის შესაბამისი გასაუბრების შედეგად შერჩეული სტუდენტები უზრუნველყოს სტაჟირების გავლისათვის აუცილებელი სათანადო პირობებით;

ბ) უნივერსიტეტის დაინტერესებისა და სააგენტოს სურვილის შემთხვევაში, მონაწილეობა მიიღოს უნივერსიტეტთან ერთობლივ ღონისძიებებსა თუ პროექტებში, სხვადასხვა საფეხურის საგანმანათლებლო პროგრამების შემუშავება-განხორციელებაში (ინფორმაციის გაცვლა, მეთოდური დახმარება);

გ) უნივერსიტეტის მომართვისა და სააგენტოს თანხმობის შემთხვევაში, უზრუნველყოს სააგენტოსათვის შესაბამისი სამსახურის წარმომადგენელთა მიერ, საჯარო ლექციების ჩატარება სტუდენტებისათვის აქტუალურ თემებზე;

დ) უნივერსიტეტთან ერთად დაგეგმოს სხვა აქტივობები, რაც ხელს შეუწყობს წინამდებარე მემორანდუმით დასახული მიზნების მიღწევას;

ე) სააგენტოში პრაქტიკის/სტაჟირების გავლის შემთხვევაში:

- გამოყოს თანამშრომელი, რომელიც იქნება სტუდენტის თანა ხელმძღვანელი (შემდგომში "თანა ხელმძღვანელი") და კონტროლს გაუწევს, ასევე, შეაფასებს სტუდენტის მიერ შესრულებულ პრაქტიკულ სამუშაოს;
- თანა ხელმძღვანელი უფლებამოსილია აქტიური ურთიერთობა შეინარჩუნოს სტუდენტის პრაქტიკის ხელმძღვანელთან და მიაწოდოს მას შესაბამისი ინფორმაცია;

3.2. უნივერსიტეტი გამოხატავს მზადყოფნას:

- ა) სააგენტოში სტუდენტთა პრაქტიკისა თუ სტაჟირების გავლის მიზნებისათვის, სააგენტოს მიაწოდოს დაინტერესებულ სტუდენტთა მონაცემები და შესაძლებლობების ფარგლებში, სხვა საჭირო ინფორმაცია მოთხოვნის/აუცილებლობის შესაბამისად;
- ბ) სააგენტოსთან ერთად დაგეგმოს და მონაწილეობა მიიღოს სტუდენტებისათვის ჩასატარებელ სხვადასხვა საორგანიზაციო ღონისძიებებში;
- გ) უზრუნველყოს სააგენტოს წარმომადგენელთა საჯარო ლექციების ორგანიზება;
- დ) მიიღოს აქტიური მონაწილეობა სააგენტოს საკონსულტაციო და სამუშაო ჯგუფებში;
- ე) გაუზიაროს სააგენტოს თავისი გამოცდილება და უახლესი კვლევები;
- ვ) შესთავაზოს სააგენტოს პერსონალს თანაავტორობა აკადემიური და გამოყენებითი კვლევების განხორციელებაში;
- ზ) მხარი დაუჭიროს სააგენტოს მისი პუბლიკაციების და გადაწყვეტილებების პოპულარიზაციაში.

**მუხლი 4. მემორანდუმის მოქმედება და შეწყვეტა**

- 4.1. მემორანდუმი ძალაში შედის ხელმოწერისთანავე და მოქმედებს მისი ძალაში შესვლიდან 4 (ოთხი) წლის განმავლობაში, თუ ამავე მუხლის 4.2 პუნქტის გათვალისწინებით არ მოხდა მისი შეწყვეტა.
- 4.2. მემორანდუმი შეიძლება ვადამდე შეწყდეს ნებისმიერ დროს, მხარის მოთხოვნის შემთხვევაში. მემორანდუმის შეწყვეტის ინიციატორი მხარე ვალდებულია, ამის თაობაზე მემორანდუმის შეწყვეტამდე არაუგვიანეს 1 (ერთი) თვისა აცნობოს მეორე მხარეს.
- 4.3. ამ მუხლის 4.2 პუნქტით მემორანდუმის შეწყვეტის შემთხვევაში, მხარეებმა, შესაძლებლობის ფარგლებში, უნდა განახორციელონ ყველა შესაბამისი და აუცილებელი ღონისძიება მემორანდუმის ფარგლებში უკვე დაწყებული ღონისძიებების დასასრულებლად.
- 4.4. მემორანდუმი შედგენილია თანაბარი იურიდიული ძალის მქონე ორ ეგზემპლარად ქართულ ენაზე. თითოეულ მხარესთან ინახება ხელმოწერილი მემორანდუმის თითო ეგზემპლარი.

**მხარეთა ხელმოწერები:**

საქართველოს კონკურენციის ეროვნული სააგენტო

მის: ქ. თბილისი, აღმაშენებლის გამზირი - 154



თავმჯდომარე:  
ირაკლი ლეჟინაძე

სსიპ - ქუთაისის საერთაშორისო უნივერსიტეტი

მის: ქ. ქუთაისი, ახალგაზრდობის გამზ. მე-5 შესახვევი, K კორპუსი



აღმასრულებელი დირექტორი/რექტორი:  
ალექსანდრე თევზაძე